

Lingwa de Planeta Lernikursa

Leson 1

WORDA

kwo-worda

Kwo es?

Es tabla.
Es kitaba.
Es kalam.

hu-inplas-kwo-worda

Hu es?

Es me. Es nu.
Es yu. Es yu.
Es lu. Es li.
Es ela.

ta=lu o ela
it=tabla o kitaba o ...

zwo-worda

Kwo lu zwo?

Lu lekti.
Lu skribi.
Lu rasmi.

GRAMATIKA

Worda-ordina

1	2	3
hu-yuan	zwo-yuan	kwo-yuan

Lu lekti. Lu lekti kitaba.
Ela rasmi. Ela rasmi piktura.

WORDA

sta-worda «hev»

Me **hev** kitaba.
Lu **hev** kalam.

GRAMATIKA

kwesti-partikla

Ob yu lekti? **Ob** yu lekti kitaba?
Yu lekti **ku**? Yu lekti kitaba **ku**?

Ya, me lekti. Me lekti kitaba.

negi-partikla

Non, me **bu** lekti. Me **bu** hev kitaba.

WORDA

mah-kwel-worda-partikla

Hu-**ney** kitaba es?

hu-inplas-kwel-worda

Es may kitaba.	Es nuy kitaba.
Es yur kitaba.	Es yur kitaba.
Es luy kitaba.	Es ley kitaba.
Es elay kitaba.	

Hu-ney es?

Es me-ney.	Es nu-ney.
Es yu-ney.	Es yu-ney.
Es lu-ney.	Es li-ney.
Es ela-ney.	
Es ta-ney.	
Es it-ney.	

suy=lu-ney o ela-ney o it-ney

kwanto-worda

Kwanto kitaba yu hev?

Me hev un kitaba.	Me hev shi-un kitaba.
Me hev dwa kitaba.	
Me hev tri kitaba.	Me hev dwashi kitaba.
Me hev char kitaba.	Me hev dwashi-un kitaba.
Me hev pet kitaba.	
Me hev sit kitaba.	Me hev sto kitaba.
Me hev sem kitaba.	
Me hev ot kitaba.	Me hev milion kitaba.
Me hev nin kitaba.	
Me hev shi kitaba.	Me hev mil ninsto-otshi-tri kitaba...

Me bu hev kitaba. Me hev **nol** kitaba.

ordina-kwanto-worda-partikla

Me hev dwa kitaba: un-**ney** e dwa-**ney**.

GRAMATIKA

pluri-forma

Me vidi pluri kitaba.	Me vidi kitaba <u>s</u> .
Me vidi mucho tabla.	Me vidi tabla <u>s</u> .
Me vidi pluri flor.	Me vidi flores.
Me vidi mucho jen.	Me vidi jenes.

Leson 2

WORDA

kwel-worda

Kwel es kitaba?

Kitaba es syao.
Kitaba bu es gran. Es syao kitaba.

Kwel es gela?

Gela es jamile.
Es jamile gela.

indiki-inplas-worda

Se es un kitaba. **Sey** kitaba es syao.
To es un kitaba toshi. **Toy** kitaba es gran.

GRAMATIKA

Worda ordina

1

2

kwel-yuan

kwo-yuan

Me vidi un syao kitaba.
Me vidi dwa syao kitaba.

WORDA

konekti-worda "a"

Lu bu hev kitaba. Me dai may kitaba **a** lu.
Me dai may kitaba a toy boy.

Lu diki luy nove kitaba **a nu**.
Lu diki **a nu** luy nove kitaba.

GRAMATIKA

Worda ordina

1	2	3		4
hu- yuan	zwo-yuan	kwo- yuan 1	a	kwo- yuan 2

Me dai kitaba a boy.

Me dai kitaba a lu.

Me dai a lu kitaba.

mah-zwo-shwoing

Zwo!

Zwo **ba**!

Kan **ba**! Yu vidi ku?

Dai a me sey kitaba!

Dai sey kitaba a me!

WORDA

kompari-partiklas

Sey kitaba es **pyu** gran **kem** toy kitaba.

Toy kitaba es **meno** gran **kem** sey kitaba.

Sey kitaba es **sam** syao **kom** toy kitaba.

Me hev tri kitaba.

Sey kitaba es **zuy** syao.

Sey kitaba es **minim** gran.

GRAMATIKA

mah-kwo-worda-partikla

Sey kitaba es pyu syao kem toy kitaba.
Sey kitaba es pyu syao kem toy-**la**.

Me hev dwa rosa. Blan-**la** es pyu jamile kem swate-**la**.

Me hev mucho flor. Me pri blu-**las** pyu kem rude-**las**.
Me pri hwan-**las** zuy.

WORDA

konekti-worda "de"

Es kitaba **de** Lena.
Es Lena-ney kitaba.

Me hev **menga de** kitaba.

Es un tasa **de** chay.
= Es tasa chay.
Me pi chay kun dwa pes (de) sukra.

Leson 3

WORDA

komo-worda

Komo lu go? – Lu go kway.
Komo ela rasmi? – Ela rasmi hao.

Ela rasmi pyu hao kem lu.
Lu rasmi meno hao kem ela.

GRAMATIKA

modus-komo-worda deriva

kwel-worda => modus-komo-worda

1. Skay es klare.
Nu vidi klare skay.
Nu vidi faulas klare**m**.

Sey auto es lente.
It muvi lent**m**.

2. Ta es karim.
Ta kan karim**m**.

3. Luy rasma es buhao.
Lu rasmi buhao.

Sey tren es kway.
It muvi kway.

kwo-worda => kwel-worda => modus-komo-worda

Lu shwo a me kom amiga.
Lu shwo amiga-**ney** worda.
Lu shwo a me amiga-**nem**.

WORDA

loko-komo-worda

May kitaba es **hir**. Yur-la es **dar**.
Lai **ahir**! Go **adar**!

Go **avan**! **Avanen** me vidi dom.
Bu go **bak**! **Baken** me vidi sol shulin.

Kan **a lefta**! **Leften** ye un jamile gina.
Bu kan **a desna**! **Desnen** bu ye toy jamile gina.

Kan **uupar**! **Uuparen** yu vidi skay.
Kan **nich**! **Nichen** ye arda.
Nu es **inter** skay e arda.

Go **aus**! Yur amigas weiti yu **ausen**.
Lai **inu**! Me weiti yu **inen**.
May mata es **inen**, may amigas es **ausen**.

Go **wek**! Me bu kredi yu.
May tren es yo **wek**.

GRAMATIKA

konekti-worda

Me hev kitaba **fo** yu. Me hev yoshi dafta **krome** kitaba.

Dai a me sey kitaba **inplas** toy-la.

Me skribi **bay** kalam.

Me yao go adar **kun** yu. Me bu yao go adar **sin** yu.

Lu shwo mucho **om** ela.

Nu bu go aus **por** bade meteo. Nu resti **in** dom.

Es tume nocha. **In** tume nocha me bu vidi kamina hao.

Nu gun **duran** mucho ora, **fon** sabah **til** aksham.

Me raki tren **fon** urba **a** vilaja.

Kwo yu zwo **bifoo** go a gunsa? Kwo yu zwo **afte** gunsa?

Me go **tra** shulin, poy **along** riva.

Leson 4

WORDA

sta-worda

Me **hev** un kitaba. May kitaba **es** jamile. Me **pri** may kitaba.

Me **hev** kitaba. Kitaba **ye**.
Me bu **hev** kalam. Kalam **yok**.

Me bu **mog** lekti: kitaba yok.

- Ob me **mog** zin?
- Ya, yu **mog** zin.

Hir bu **darfi** fumi.

Es yo tarde. **Treba** go a dom.

- Shwo ba, komo go a basar? Me **treba** kupi fan.
- Un-nem **treba** turni a desna, poy a lefta, poy go ba rektem avan.

Fo sey gunsa **treba** pyu jen.

Me **pri** lekti. Me **yao** lekti mucho. Me **nidi** mucho kitaba. **Treba** kupi li.

Dabe jivi, jen **mus** chi e pi.

Me **mus** lerni mucho. Me **mus** lekti mucho kitaba. Me **bu gai** lanfai.

Sempre **gai** shwo veritaa.

GRAMATIKA

worda kombina

mog		+ zwo
gai		
mus		
darfi		

hev		+kwo
bu hev		

pri		+ zwo
yao		
nidi		
treba		

WORDA

unisi-partiklas

Me hev dwa amiga: Lena **e** Dima.

Me pri gani **e** rasmi.

Li sempre go tuhun: lu **e** ela.

Me pri gani **e** lu pri rasmi.

Ob yu pri rasmi **o** gani?

Me pri **i** rasmi **i** gani.

Ta bu pri **ni** rasmi **ni** gani.

Me hev kitaba **bat** me bu yao lekti.

Me shwo a yu **dabe** yu mog samaji me.

Me shwo a yu **obwol** yu bu yao audi me.

Yu mog pren sey kitaba **si** yu yao.

Si yu lekti sey kitaba, dan yu en-jan mucho kosa om animal.

Me treba yo go a dom, **bikos** es tro tarde.

GRAMATIKA

relati-partikla «ke»

Me jan **ke** yu bu hev sey kitaba.

Me dai a yu sey kitaba **fo ke** yu lekti it.

Krome ke yu mog lekti it, yu mog yoshi kan pikturas.

Me yao somni **inplas ke** me audi ela.

Bat me mus audi **duran ke** ela rakonti.

Me mus weiti **til ke** may amiga lai.

Kindas yao go somni **kun ke** yu rakonti fabula a li.

Kindas yao somni **sin ke** yu klosi dwar.

Nu bu go aus **por ke** nu mus weiti lu hir.

Lu shwo mucho **om ke** lu es zuy riche jen.

Leson 5

WORDA

taim-partikla

wek-taim

Me **he** lekti sey kitaba yo. Me bu nidi it pyu.
Me lekti-**te** sey kitaba. It es ya muy interes-ney.

He pluvi. Nau pluva yok.
Pluvi-**te**. Nau pluva yok.
Pluvi-**te**. Haishi pluvi idyen.

lai-taim

Dai a me yur kitaba. Me **ve** lekti it.

Me dumi ke **ve** pluvi.

GRAMATIKA

taim-partikla kombina

Ta shwo ke **ve** pluvi.
Ta shwo-**te** ke **ve** pluvi.
Ta **ve** shwo ke **ve** pluvi.

Ta shwo ke pluvi-**te**.
Ta shwo-**te** ke pluvi-**te**.
Ta **ve** shwo ke pluvi-**te**.

Zai pluvi.
Zai pluvi-**te**.
Ve zai pluvi.

Wen yu lai-**te** a dom ela **zai** kuki-**te** deyfan.

Wen yu lai-**te** a dom ela **he** kuki-**te** deyfan.

Wen yu **ve** lai a dom ela **ve zai** kuki deyfan.

Wen yu **ve** lai a dom ela **ve he** kuki deyfan.

Unves, mucho yar bak, ye un gela. Ela nami Rude Shapa-ki. Un dey mata voki ela, shwo: "Rude Shapa-ki, bi karim, go visiti yur oma".

Yeri me zai lekti kitaba. Turan may amiga lai. Lu krai: «Yu bu he audi ku? Manya nu hev gro-konserta! May brata es hir. Lu janmog gani gro-hao! Nu inviti yu. Yu lai ku?»

WORDA

inplas-kwel-worda

Oli kinda pri bonbon.

Kada kinda yao chi bonbon.

Sey kinda chi bonbon **ol** dey.

Hir **eni** kinda mog lekti e rasmi.

Koy kinda pri lekti pyu kem rasmi.

Otre kinda pri rasmi pyu kem lekti.

Nul kinda pri go somni.

GRAMATIKA

frasa kom kwo-yuan

Me jan **ke** yu he zwo mucho.

Bat me bu pri **se ke** yu he zwo.

Me vidi **ke** lu shwo kun ela.

Bat me bu mog audi **to ke** lu shwo.

frasa kom kwel-yuan

Boy **ke** yu vidi janmog gani muy hao.

Yu vidi boy **kel** janmog gani muy hao.

Ti yu vidi **na** boy janmog gani muy hao.

TEXTA

Meteo.

Sedey meteo es hao. Surya brili, badal yok. Me promeni in shulin.
Sirkum ye mucho grin baum. Es garme.

Yeri meteo bin ga otre. Pluvi-te. Me bin mokre fon kapa til pedas, bikos
me fogeti-te ambrela. Bin lenge.

Kwel meteo ve bi manya? Me bu jan, me mog sol gesi. Shayad pluva ve
yok.

Leson 6

WORDA

budefini-ney hu-inplas-kwo-worda

Oni shwo ke lu rasmi hao.
Bat me bu pri luy pikturas.

Yu stan tro dalem.
Dar **oni** bu mog audi nul worda!
Lai pyu blisem!

returni-inplas-worda

Yu es ga gande. Go woshi **swa**!

Kada sabah me woshi **swa**.
E may mursha yoshi razi **swa**.

Ob yu mog ordini oli sey kitaba **selfa**, sin ke oni helpi yu?

Nu samaji **mutu**.

GRAMATIKA

mah-kwo-yuan-partikla

- Me pri sey kitaba. Ob me mog pren it?
- Kwo yu yao pren?
- **Den** sey kitaba me yao pren. Me yao pren sey kitaba.

Me dai-te sey kitaba a sista de may amiga.
Me dai-te a sista de may amiga **den** sey kitaba.

tema de frasa

Sey kitaba, me begin-te lekti **it**. Es muy interes-ney.

Yur kalam, wen yu fini rasmi, dai ba **it** a me.

WORDA

inplas-kwo-worda

Walaa un klosi-ney boxa.
Me yao ofni it.
Me bu jan kwo es inen.
Bat me nadi ke dar ye **koysa** kel es muy jamile.

Me audi koy vos.
Dar ye **koywan**, baken dwar.

Me bu yao chi! Me bu yao chi **nixa**!

Me bu jan luy nam. Me bu koni **nulwan** hir.

Me pri **olo** ke yu kuki.
Yu mog kuki **enisa** ke yu yao.

Me pri **oli** ke yu lerni tuhun.
Yu mog inviti **eniwan** ke yu yao.
Kadawan mog lai.

inplas-komo-worda

Pon yur bao a **koylok**.

Koytaim me dai-te a yu may kitaba.
Me nidi it nau. Ob yu mog returni it a me?

Me bu remembi a wo me pon-te may kalam.
It mog bi **enilok**.
Me shuki e me bu mog findi it **nullok**.

Hir yur kalam yok. Shuki ba **otrellok**.

Yu koni kamina a nuy dom.
Yu mog lai **enitaim** ke yu yao.

Ta lekti **oltaim**. Suy kitabas ye **kadalok**.

Koyves me visiti may oma kel jivi ausen urba.
Laste yar me he visiti ta **plurives**.

Ob yu es in dom?
Unves me lai a yu, yu bu es in dom.
Yur molya shwo: «Lai ba **otreves**».

— Me mus zwo to **koykomo**.
— Yu mog zwo to kom yu yao. Yu mog zwo to **enikomo**.

— Yur jawaba bu es prave! Yu bu he resolvi sey taska!
— Me he resolvi... **koygrad**...
— Non! Yu he resolvi it **nulgrad**!

TEXTA

Telefon-ney toka

- Haloo! Lena?
- Ya, es me.
- Hao aksham!
- Aksham hao!
- Nu go ba tuhun a playa manya.
- Snova ku?
- Ya. Me bu es basta tume.
- Wel, me bu jan. Me treba dumi.
- Ye nixa fo dumi. Yur brachas e gambas es ga blan. Yu gai go. Nu ambi gai go.
- Bat me hev mucho dela.
- Dela mog weiti. Playa es pyu muhim kem enisa otre. Samaji ba, surya dai sanitaa, surya dai jamilytaa.
- Wel, shayad yu es prave. Wen nu go?
- Ranem. Kem pyu ranem, tem pyu hao.
- Hao. Me telefoni tuy ke me en-jagi.
- Pyu hao, telefoni ba wen yu es tayar. Hao nocha!
- Nocha hao!
- Hey, Lena, weiti ba idyen! Me hampi fogeti: pren ba okula do surya, dabe kovri okos. Yoshi pren ba koysa fo kovri nos.
- Me ve pren shapa do surya, it kovri ol fas.
- Dan hao. Til sabah!
- Til sabah!

Leson 7

WORDA

konekti-worda "pa"

Ta go kway. Ta zwo gran stepa.
Ta go **pa** gran stepa.

May oma jivi in vilaja. Inter vilaja e urba ye shi kilometra.
May oma jivi **pa** shi kilometra fon urba.

Bu es dalem. **Pa** fakta, es ga blisem.

Ta mog lekti e toki **pa** same taim.

Pa un taraf de riva ye shulin, **pa** otre taraf ye livada.

konekti-worda "al"

Ta go e gani.
Ta go **al** gani.

Me vidi yu, e me joi.
Me joi **al** vidi yu.

Kindas somni, e winda es ofni-ney.
Kindas somni **al** ke winda es ofni-ney.
Kindas somni **al** ofni-ney winda.

Wen me audi sey gana me hampi sempre plaki.
Al audi sey gana me hampi sempre plaki.

GRAMATIKA

budefini-ney wek-taim

- Yu swimi ya gro-hao!
- Me **gwo** zun swiming.

- Skusi ba, ob nu **gwo** miti koylok? Semblem me koni yur fas.
- Me bu rekoni yu. Non, nu bu **gwo** miti.

blise wek-taim

Me bu hev bonbon.
Me **yus he** chi laste-la...

- Nuy kota es wo?
- Ta **yus lopi-te** wek.

blise lai-taim

Me bu mog go aus nau.
Me **sal** chi deyfan.

yo-forma

Me bu lekti sey kitaba pyu.
It **es** yo lekti-**ney**.
It **es** yo lekti-**ney** bay me.

pasive partikla

Taska ke me resolvi es mushkile.
Sey taska haishi bu es resolvi-ney.
Me resolvi it nau.
Taska **gei** resolvi.
It **gei** resolvi bay me.

yao-shwoing

Me **wud** yao bi rega. Me **wud** regi zuy gran regilanda in munda.
May molya **wud** bi zuy jamile gina in may regilanda. Ela **wud** janmog gani tanto hao...

Pa nofortuna, me bu es rega...

kombina de pluri akta

— May son lubi un gela. Lu sempre shwo ke ela es zuy jamile e zuy saje gela in munda.
— Oo, oli **lubi-she** manjen shwo samem.
— Bat lu iven bu jan ela-ney nam! Lu es tanto timide ke lu bu mog kwesti ela, komo ela nami. **Al vidi** ela lu fa-rude e bu mog shwo nixa. E lu sidi **kan-yen** ela e **audi-yen** to ke ela shwo. E **afte vidi** ela-ney smaila lu smaili selfa, tote dey.

Tu shwo veritaa es hao.

Tu samaji es tu pardoni.

Tu begin es **lo** zuy mushkile.

Sempre gai samaji **lo** shefe.

Me hev tri kota: dwa es brave e tri-ney-**la** es ga fobishil. Brave-**las** batali kada dey. Li yao jan hu es zuy forte. Fobishil-**la** neva batali kun brave-**las**. Ta pri komuniki kun un maus.

Brave kotas kwesti ta: «Kwo yu zwo? Ob yu bu jan ke maus mus fobi kota? Yu mus bu komuniki kun ta. **Lo** tal bu gai repeti!»

Bat fobishil kota shwo: «Me bu kredi ke maus mus sempre fobi kota. Ta es may amiga. Me bu yao ke ta fobi me. **Tu** fobisi es muy fasile. Bat **tu** akwiri hao amiga bu es fasile».

Leson 8

WORDA

partikla "hi"

Hu rasmi?
Me ku rasmi? Yu ku rasmi? Non.
Ta hi rasmi.

Ta rasmi ku? Mogbi ta skribi leta?
Ta **rasmi hi**.

Yu hi mus go adar!
Yu **mus hi** go adar!
Yu mus go **adar hi**!
Yu mus go adar **nau hi**!

kausi-worda "mah"
kausi-partikla "mah-"

Ta bu lekti kitaba.
Me **mah** ta **lekti** kitaba.
Me shwo: "Sey kitaba es verem hao. Lekti ba!"
Nau ta lekti kitaba.

Yu shwo a me hao habar.
Yu **mah** me **joi**! Yu **mah-joi** me!

Me treba shwo kun ta.
Mah ta **lai** ahir! **Mah-lai** ta a me!

Ye papir.
Me **mah-jal** papir. Me **mah** it **jal**.
Papir jal.
Papir yok.

Doga es inen.
Me **mah-aus** ta. Me **mah** ta **aus**.
Doga es ausen.

bikam-partikla "fa-"

In shamba ye shao jen.
Kelke jen zin shamba. Jen **fa-pyu**.
Yoshi kelke jen zin. Jen **fa-mucho**.

In shamba ye mucho jen.
Kelke jen chu shamba. Jen **fa-meno**.
Yoshi kelke jen chu. Jen **fa-shao**.
In shamba snova ye shao jen.

- May kalam sempre lagi-te hir. Bat yeri it **fa-wek**.
- Shayad koywan pren-te it.

Dey fini. **Fa-nocha**.
Nocha fini. **Fa-dey**.

Hima fini. Vesna lai. **Fa-vesna**.

Saif fini. Oton lai.
Al **fa-oton** mucho baum begin mah-lwo lif.

GRAMATIKA

kwel-worda => zwo-worda

Akwa es lenge.
Me **mah-garme** (garmisi) akwa.
Akwa **fa-garme** (garmifi).
Akwa es garme.

Me raki auto.
Auto muvi lentem.
Me **mah-kway** auto.
Auto **fa-kway**.
Auto muvi kway.

Kinda es nokalme.
Me **mah-kalme** (kalmisi) kinda.
Kinda **fa-kalme** (kalmifi).
Kinda es kalme.

Shamba es gande.
Me **mah-klin** (klinisi) it.
Shamba **fa-klin** (klinifi).
Shamba es klin.

Planta es yunge. Planta es nise.
Planta kresi. Planta **fa-gao**.
Planta es gao.
Planta **fa-lao**.
Planta es lao.

Kalam es longe.
Me rasmi mucho bay kalam.
Kalam **fa-kurte** (kurtifi).
Kalam es kurte.

Klaida es mokre.
Me **mah-suhe** (suhisi) klaida.
Klaida **fa-suhe** (suhifi).
Klaida es suhe.

Sikin es agude.
Me kati mucho kosa bay sikin.
Sikin **fa-tupe** (tupifi).
Sikin es tupe.
Treba **mah-agude** (agudisi) it!

zwo-worda => kwo-worda

1. gani => gana
rasmi => rasma
2. pi => pia
chi => chia
3. gun => gunsa
yao => yaosa

kwel-worda => abstrakte kwo-worda

1. jamile => jamilytaa
vere => verityaa
2. karim => karimtaa
gao => gaotaa
kway => kwaytaa

Leson 9

WORDA

Syao-worda "en-"

Ela bu zai gani.
Nu pregi: "Plis gani!"
Ela **en-gani**.
Ela zai gani.

Al nocha me somni.
Ranem pa sabah me **en-jagi**.
Al dey me jagi.
Tardem pa aksham me **en-somni**.

Me **en-jan** oli habar via internet.

Syao-worda "ek-"

Koywan **ek-shuti**.
Koywan **ek-krai** por foba.

Kota sidi on poda, poy turan **ek-salti** on tabla.

SYAO DIALOGA

— Skusi ba, kwel klok es?
— Es klok ot.
— Danke.
— Bi hao.

— Skusi ba, sey bus go-bu-go a stasion?
— Go.
— Shukran.

— Lasi me present: es may amiga Erik.
— Joi por en-koni yu.
— Me toshi.

— Namastee! Komo yu sta?
— Me sta hao. E yu?
— Me sta normalem. Komo yur familia sta?

- Shukran, oli sta muy hao.
- Skusi por ke me tardi.
- Es nixa.
- Shwo pyu lautem, plis.
- Hao, me ve trai.
- Kare Alvaro, hir bu darfi fumi.
- Pardon ba, me bu jan-te se.
- Skusi por ke me telefoni tanto tardem.
- Es nixa. Kwo ye?
- Gratula! Yur gunsa es gro-hao! Yu pai-te interes-ney resulta.
- Danke gro! Bat treba gun for.
- Me tamani a yu sukses! Hay yu fai sukses!
- Shukran por hao worda.
- Lasi me doni a yu sey bolkalam.
- Shukran por dona! Es muy priate.
- Segun me, sey gaset a fai mucho luga. Yu konsenti ku?
- Ya. Me hev same opina.
- Adyoo! Hao safara!
- Adyoo! Shwo swasti a yur familia.
- Ob yu mangi sedey?
- Sedey mangi, bat manya me es libre.
- Magari meteo manya es hao!
- Ob hao, ob buhao, nu treba safari enikas.
- Kwel es yur yash?
- May yash es trishi yar.
- E yur son, ta es kwanto-yar-ney?
- Ta es sem-yar-ney.
- Komo yu nami?
- Me nami Yonas.
- Yu janmi in kwel yar?
- Me janmi in yar 1985.

- Kwel es yur telefon-numer?
- Nin dwa tri...
- Un minuta, me bu es haishi tayar fo skribi... Kamon, shwo!
- Also, es nin dwa tri sem ot nol char.

- Sedey es kwel datum?
- Sedey es dey 12 mes 3 yar 2012.

- Sedey es kwel wik-dey?
- Sedey es undi.
- Also manya es dwadi e aftemanya es tridi.
- Ver.

- Ob ta es gami-ney?
- Ya, ta es gami-ney, e ta hev dwa docha.

- Wo ta bin pa laste wik?
- Ta bin morbe. Bat nau ta es snova sane.
- Shwo ba swasti a ta. Hay ta sta hao.

- Ob yu es santush om safara?
- Ya, sertem.

- Afsos, me mus go. Til rividi!
- Til sun!

- Adyoo! Sta ba hao!
- Til rimiti! Shwo salam a yur molya.

- Chao! Nu vidi mutu poy.
- Vidi mutu!

- Hao Nove Yar! Zuy hao tamana!
- Shukran, sama a yu!

- Hao Yul!
- Hao gro!

- Shukran por atenta, kare amigas! Til nove mita!